



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 3

Yangia anidakangma : Tir Yimiyim

tiryimiyim@aolima

tir yimiyim

TAPAK 10

Assam CM Himanta-i Tinsukia nung grenade apokdak semdang

Italian Open: Karolina final-i iogo



VOL. XVIII NO. 211 (ADOK 211) DIMAPUR AMUNGNÜ (SUNDAY) MONUPII (MAY) 16, 2021 ₹ 5.00

COVID-19 Nagaland: Nisung 304 dak putet: 6 asü

Kohima, May 15, 2021 (TYO): Honibarnü Nagaland nung nisung 304 dak COVID-19 putet aser nisung 6 asü. Tanü putetertem züngsema nisung 17,835 dak COVID-19 putetogo aser tasür 196 kümogo.

"Tanü nisung 304 dak COVID-19 aliba putet. Parnokji Dimapur nung nisung 148, Kohima nung 121, Mokokchung nung 11, Tuensang nung 10, Mon nung 4, Phek o Wokha nung asemsem (3), Zunheboto nung 2 aser Longleng o Kiphire nung kaka (1) lir" ta Health & Welfare Minister, S Pangnyu Phom-i metetdaksü.

"Maneni, tanü COVID-19 agi shiranger nisung 53 taneptsü angu. Parnokji Dimapur nung 33, Mon nung 9, Mokokchung nung 8 aser Kohima, Peren o Phek nung kaka (1) lir" paisa ashi.

Nisung 17,835 rongnungi 13,087 taneptsü nguogo aser tang

3,985 anepaludar, ta Minister Pangnyu-isa ashi.

"Honibarnü COVID-19 puteta alir nisung 6 asüba züngsema tasür ajak agi 196 kümogo, saka parnok 11 bo tanga tashidak ajanga asü. Nagaland nung COVID-19 puteter nisung 567 tashi tanga state temi ogo" ta paisa metetdaksü.

Honibar tashi nung Nagaland nung nisung 1,86,024 nem COVID-19 vaccine indang dose 2,39,791 agütsüogo, ta State Immunization Officer Dr Ritu Thurr-i ashi.

Vaccine agirtemji frontline workers 54,802, healthcare workers 15,250 aser arishi küm 45 ser temapur 1,15,972 lir, ta paisa ashi.

"Nisung 53,767-i vaccine indang dose anaprong agiogo. Parnokji front-line workers 27,820, healthcare workers 10,152 aser arishi küm 45 ser temapur 15,795 lir" ta Dr Thurr-isa metetdaksü.

EMC nung Covid-19 atema yipden 30 bendenloker

Dimapur, May 15, 2021 (TYO): Rangapahar nungi Army teyari agia Dimapur nung aliba Eden Medical Centre nung Covid-19 agi shirangertem anepaludak ka yangluogo.

May 14, 2021 nungi Eden Medical Centre nung yipden 10 indang Covid-19 ward ka lapoka lir aser iba denji tang kima nung süki agi yangluba nung yipden 30 bendenloksü.

Army-i mozü ki kima nung makeshift tents yangluogo aser state sorkaria oxygen cylinders agütsüogo, anungji kobi melii Eden Medical Centre kima nung yangluba nung shiangertem anioka anepalutsü imlar, ta osang ajanga ashi.

Eden Medical Centre-isa COVID-19 helpline numbers 9362790293/9863665800 ajanga yipden indang osang metetpelatsü metetdaksüogo.

India nung Covid-19 tensa tajungba akümer Shiranger 85% ji state 10 nung dang lir

New Delhi, May 15, 2021 (Agencies): India nung Covid-19 tensa tajungba kümdar aser sorkari maneni wara azüoktsü atema inyaksü, ta NITI Aayog züngsem V K Paul-i metetdaksü.

Linük nung coronavirus puteta alir 85% ji state 10 nung lir, ta tanü health ketdangsurtemi osangbener dang ashi.

State 11 nung COVID-19 puteta anepaludak nisung lakh kaka tema lir, state 17 nung nisung 50,000 teküpok aser state 8 nung nisung 50,000 nungi lakh 1 tsünga lir, ta Union Health Ministry-ia metetdaksü.

Külen, Prime Minister Narendra Modi-i Honibarnü Covid-19 tensa atema senden ka ayonga menogo.

State kar nung ventilators mamshii dang ayuba osang angazükba atema PM Modi

Centre sorkari state tem nem ventilators agütsüba osang tejangja meshiogo.

"State sorkartemi Covid-19 putetba osang tejangja ashitsüla kechiyong nisung aika dak putetbaji mapa junga meinyakba agi masü," ta Modi-isa metetdaksü.

Honibarnep 8:00 ako tashi tesüiba ghonda 24 tsünga India nung nisung 3,26,098 dak COVID-19 aliba putet aser nisung 3,890 asü, ta Union Health Ministry-i ashi.

Kasa mapang tsünga COVID-19 puteta alir nisung 3,53,299 taneptsü angu, ta parnokisa ashi.

Tanep tashi nung putetertem züngsema India nung nisung ajak agi 2,43,72,907 dak COVID-19 putetogo aser nisung 2,66,207 süogo.

Dimapur nung COVID Hospital tasen ka yanglutsü

Dimapur, May 15, 2021 (TYO): Dimapur nung nisungtem dak Covid 19 kanga putetba agi sorkar aser nija mozü kitem nung Covid 19 shirangertem anepaludak mali kümogo.

Mozü ki kanga rongdak nungdakba ajiteta Agriculture Production Commissioner (APC) Nagaland, Y Kikheto Sema (IAS), Dimapur Deputy Commissioner, Chief Medical Officer aser tanga ketdangsurtemi Honibarnü Dimapur nung sorkar kiojen kar reprangdanga senzü aser idangji COVID Hospital yanglutsü atema kiojen kar shim.

Sorkar kiojen ka nung yipden 100 aliba mozü ka mezüng yanglutsü aser ibaji yaser yipden 250 nugi 300 shi ka akümtsü.

Sorkar kiojen balala sema senzüba sülen DC indang conference hall nung senden ka amandang Y Kikheto Sema-i bangdak ketdangpurtem, district administration, Power, PHE, Housing department tem dang hopta ka tsünga ki renemtsü aser Medical department-i anogo 10 tsünga yipden 100 aliba Covid hospital yanglutsü atema tetuyubatem agütsü.

"Kohima district dak alaka tanga district mozü ki shia nungi doctor kaka aser nurse anana nem iba mozü ki tasen reprangdaksütsü sorkari lemtetogo," ta paisa metetdaksü.

"Nübo agi meperira retired doctor aser nurse tem dang meimchir meimba tangatetba nung yaritepdaksütsü akok. Covid-19

agi kanga shirangertem Dimapur Covid hospital, Referral Hospital aser ICU aliba nija mozü kitem nung anepalutsü aser tera shirangertem mozü ki tasenba nung anepalutsü" ta Kikheto-isa ashi.

"Nisungtemi social media kanga kümdanga amshitsüla aser tangar shisabuludaksütsü mesüra aoksadaksütsüsa olulu osangtem meprokshitsüla. Iba dak sendakba nung Deputy Commissioner aser Commissioner of Police Dimapur-i nungdakba tetuyubatem agütsütsü" ta paisa shisem.

Dimapur district nung COVID-19 aliba nisung 2000 shi ka Home Quarantine nung lir aser temolungertem nem e-counselling agütsütsü, ta paisa ashi.

Frontline workers talisa Health workers-i bendanga agüja inyakba atema pelar. Külen, itasen tila dang süaka Home Guard personnel-i Covid 19 agi asürtem mang anepaluba atema pelar" ta Kikheto-isa metetdaksü.

Dimapur district administration, Police aser Medical department amalitepa Covid-19 wara anema inyakba atema tenüngsang agütsür, ta paisa ashi.

Dimapur nung aliba Sikh nungeri tanü nungi Dimapur Covid hospital nung shiranger anepalurtem nem lunch packets 100 agütsüba atema tenüngsang agütsür. Maneni, Western Sumi Baptist Churches-i Covid 19 agi asüba sensakertem nem coffin alia agütsüba atema pelar, ta Kikheto-isa metetdaksü.

APC Nagaland Y Kikheto Sema (IAS) ya state sorkari Dimapur District Task Force den yariteptsü atema mapa lemzüksü aser tanü senden nung Deputy Commissioner Rajesh Soundararajan IAS aser Commissioner Police Rothihu Tetseo nati pa pelaa agizük.

COVID-19 HOSPITAL ATEMA LUDENTENTET:

Dimapur nung COVID-19 agi shiranger nisung aika akümba atema Institute of Hotel Management (IHM), Dimapur nung yipden 100 aliba COVID-19 Hospital yanglutsü atema luden ka tentetogo, ta DC Rajesh Soundararajan IAS-i tanga sangdong ka nung metetdaksü.

"Iba luden yagi maparen ajak ketdangsüa reprangtsü aser May 19, 2021 tashi nung Chief Medical Officer, Dimapur ket nung mozü ki agütsütsü. Züngsem ajaki Convener den amalitepa inyaksü aser tongtipang teinyaksü ka ama nübo, rongsen aser osettsüttem agi yariteptsüla" ta Dimapur DC-isa ashi.

Züngsemtem:

1. Thejavizo Nakhro, SDO (C) Dimapur Convener (Contact - 9402831878)
2. EE, PWD (PHED)
3. EE, PWD (Housing)
4. EE, PWD (Electrical)
5. EE, PWD (R & B)
6. CMO/Dy. CMO
7. SDO, CAWD
8. Rovise Phoji, Tourist Officer
9. Nukshimatong, EAC (Sadar) - Member Secretary

Mkg nunga PSA oxygen plant yakta amenoktsü

Mokokchung, May 15 (TYO): Imkongliba Memorial District Hospital (IMDH) Mokokchung nunga PSA oxygen plant amenoktsü asoshi maparen tenzüko ager anogo ishika tsünga nung renemtsü, ta Mokokchung CMO, Dr. Chubala Aieri osangbenertem den la indang office nung jembidang metetdaksü.

Iba plant ya PM Cares Fund kübok aruba lir, ta angazük.

PSA Oxygen Plant (Model: Medo 12.5) dak sentakba kol ajak

Mokokchung tonga aruogo aser mapa tenzüko, anogo 1/2 tsünga nung machine jibo amenoktsü. Iba kol capacity-ji 200 LPM (liter per minute) lir aser iba ya yipden 50 tashi nung amshitettsü, ta CMO-isa ashi.

Iba plant nung oxygen-ji refill mesütettsü saka yangi nungi indangindanga dang yipden shia jagi atsür aotsü kechiyong ibai direct system lir, ta Mokokchung CMO-i jangjashitsü. Ano Mokokchung atema talila 50 point arutsü lir, ta osang angazük.

Iba kol ya amenoker külen ang, yiden 50 (50 point) atemaji yangi nungi atsür aotsü aser ano oxygen-ji ajung-majung (quality) tendangtsü atema Delhi-i bener yoktsü aser yang nung jagi osang tejangja ka arur külen ang iba ya mapa küma amshitettsü, aji oda, Delhi nungi osang arutsüba maparenji hopta ka shi agir, ta Absstem Technologies nungi arur Installation commission, Gurmed-i iba osangbener den jembidang metetdaksü.

Nagaland aser Assam nung menoknok anak

Dimapur/Guwahati, May 15, 2021 (Agencies): Honibarnep 5:00 ako meta Nagaland nung Richter scale nung 4.2 tashi asadangtetba menoknok ka anak.

Mokokchung nung kilometer 74 shi pilar menoknokki anak. Menoknok

anakba tiyongtsü nung ali telunglen kilometer 81 irr ano, ta National Centre for Seismology (NCS)-i metetdaksü.

Menoknok ajanga nisung takütem aser kiojen akoksaba osang kecha mali, ta parnokisa ashi.

Maneni, Honibar anepdang 8:33

ako nung Assam nunga Richter scale nung 3.9 ta asadangtetba menoknok ka nokogo.

Sonitpur district kübok Tezpur nungi kilometer 41 shi pilar menoknokki ali telunglen kilometer 16 irr anak, ta NCS-isa metetdaksü.

Dimapur & Kohima nung total lockdown tiptema liogo



Kohima



Dimapur

Dimapur, May 15, 2021 (TYO): State sorkari coronavirus azüoktsü atema total lockdown tenzüka anogo tiptema dang süiogo.

Tanü Dimapur nung gari aser nisungtem shinga mesenzüi azüngazünga liasü.

Tanep New market aser tanga tesemtem nung essential

commodities aser aonsotsü ayokba dokantem lapoka liasü.

Kiyong ketdangsur karibo pei pei kiyong nung aliba lenmang atsüdang aser nisungtem

senzusenbongba noktangtsü atema anüksü nübo lemzükja liasü.

Külen, inter-state check gate nung sepaitemi Dimapur-i

arurtem ajak tendangtsü tenzüko.

Maneni, Kohima nunga tanü total lockdown takok ngua liogo.

District administration-i Kohima nung tongtipang tesemtem nung police aser Dobashi tem mapa lemzükja nükdaksür.

Maneni, kiyong kar nung volunteer temi tangar marudaksütsü atema atsüdang anüker aser COVID-19 inyakyim indang banners yuja lir.



May 15 nü nungi state ajunga mokdanga ayu tenzükba sülen Mokokchung nung main police point azüing azünga akümba noksa nung angur.

National Dengue Day May 16 nü amungtsü

Dimapur, Monupii/May 15 (TYO): National Dengue Day ya May 16 nü Dengue tashidak indang tangazükba agütsüsü nükjidong nung amunger. Iba dak sendakba nung National Vector Borne Disease Control Programme-i nüburtem dang, COVID-19 wara pokteter aliba mapang dengue tashidak nungi jenboa alitsü atema jenjang tapet agitsü mepeshia metetdaksüogo. Dengue tashidak agi atongba temaitsütem rongnung, tekolak kanga menüba, temang meta shirangba, tetsü aser teloktep nung tashiba aliba, tenük telonglen ashiba, mangmanga saktünütsü autuba, measles ama kom adokba amala densema lir.

Temetettsükaji 'aedes aegypti' merila (mosquito) koba ajanga dengue tashidak prokshia odaktsür, iba merila ya 'synanthropic' species ka lir, koba nüburtemi yanglur aliba tesemtem nungi ajangzükter. Wara pokteter aliba ajanga Programme balala densema inyakayim ajak nung kongshir aliba mapang state NVBDCP programme-i nüburtem dang pei temeket nung dengue merila poktetba tesemtem merikteta shilem tajung agitsü mepeshia metetdaksüogo. Ki temeket nung naropot amendakdak, pongdang tazüingtem, cooler, tyre, buckets amala nung tziü atsiingdena aliba intoktsüla, kechiyong dengue

merila iba amala tziü bangdakaer aliba tesemtem nung renloka aoer, aser merila entsü ya hopta ka nung rizükter. Tziü bendena ayuba pongdangtem ajak kanga junga nembanga ayutsüla aser plastic marok, pongdang tejen, tyres, coconut terep amala janajaritem meriktettsüla aser pei temeket hopta shia merikteta alitsü nüingdaker. Maneni nisung ajak anüingdang aser aonung mosquito net mesanger mejangtsü nüingdaker aser talisa mashisa aliba tetsürtem aser tanurtem atema iba ya kanga tongtibang. Temang meta shirangra takaratiba nung doctor den tongteprateptsü nüingdaker.

Tuensang DC-i nüburtem ajak anidaktsü atema tetuyuba kar agütsü

Dimapur, Monupii/May 15 (TYO): Deputy Commissioner Tuensang, Kumar Ramnikant IAS-i nüburtem ajaki tashi angaa anidaktsü atema tetuyuba kar agütsüogo. **Tetuyubatem:** 1. Tenüingdakba osettem, aonsotsü, shi/ango, mamatsü, amtsük, local grocery stores, hardware, animal feed ayokertem tesem ajak nung anepdang 6:00 ako nungi anüingdang 12:00 ako tashi lapoktsü melatsü. Tenüingdanba osettem ya 'one card one household' inyakayim ajanga achaayangtsü. Kibong shia atema shopping card ya pei kiyong ketdangsurtemi agütsüsü. Maneni nüburtem dang tenüingdakba osettem

pei kiyong nungi dang alitsü metetdaksüogo. 2. Nisung anenzükdak hotel nung staff ajemer lapoktsü melatsü, aser COVID-19 inyakayim shidak benoktsüla. COVID-19 negotiate test ya hotel/lodge/guest house ajak nung agitsü. Restaurants/hotels nung nüburtem adenshi chiajemsü memelatsü saka kidangi bener aotsü melatsü. 3. Ward/colony/sector/yimtsüing nung kisü jensü maparen aser mapa inyakertem anioka mapa inyakdaksüba ajak ward/colony/sector aser yimtsüing ketdangsurtemi achaayangtsü. Tang tinyakdak alirtem dak alaka tanga district nungi mapa inyakertem anir arutsü

memelatsü. 4. Agriculture aser allied maparen ajak inyaktsü melatsü, aser iba maparen nung sotaka alirtem anepdang 6 nungi 9 ako tashi nung pei wadang/alui aotsü melatsü aser nikongtsüsü 4 nungi 6 ako tsüingda meyipa arutsüla. 5. Arish küm 18 aser temapurtem vaccine agi aotsü atema senzüseningpongtsü melatsü, saka ward/colony/sector ketdangsurtem nungi temelaba agitsüla. Iba tetuyuba sülen manidakertem IPC Section 188 aser tanga temzüing ozüing tapet dak ajemdaker merenshitsü, ta kasa sangdong ajanga metetdaksü.

Wokha nung police temi brown Sugar apu



Dimapur, Monupii/May 15 (TYO): Itangitertem nungi osang tejangka ka angazükba sülen Wokha Police Station aser Women Police Station nungi team kati May 12 nü Doyang apu nung Assam nung züingoksemer aliba Getz gari ka sot. Gari sota bushitsüingdangba mapang police temi gari nung mena alir nisung ana ket nung Brown Sugar asütsü ta temulung melemi blemba temesepba mozü gram 23 shi

ngutet. Iba ken o dak sendakba nung Zuchanthung Tsopoe (40 years) aser Libemo Tsopoe (31 years) na puogo, aser ken o maneni bushitsüingdangtsü atema NDPS ACT Section 22 (b) kübok Women Police Station, Wokha nung ken o ka benokogo. Tanga tatalokba ka nung, 40 Assam Rifles, Wokha Battalion-i May 14 nü Wokha jila kübok Tsumang "A" colony meita aoba mapang Spasmo Proxyvon

capsules 115, Sunflower asütsü ta temulung melemi bilemba talep 34 aser Brown Sugar asütsü ta bilemba temesepba mozü gram 90 puogo. Iba ken o dak sendakba nung Zuchilo Ezung (45 years) aser Nzanbemo Murry (39 years) na puogo. Aija alisang ana den parnok ket nungi ngutetba temesepba mozütem Wokha Police Station nem bendanga agütsüogo, aser ken o maneni bushitsüingdangtsü.

Angh R.N Ravi-i asükhu lemsatep

Dimapur, Monupii/May 15 (TYO): Angh R.N Ravi-i sangdong ka ajanga, May 15 nü Tamlu nung asür Bautung Phom kinungtsü Manli Phom asüba osang angazüka manga ayimba lemsatepogo. Asür Bautung Phom ya Nagaland State nguteter rongnung ka liasü. Manli Phom ya la kinungbo Bautung Phom tejakdangi aoba tashi ka ama teti bilemtettsü, shiba yakta süadok aser anojungi lai kibong khuret ajak abentsüsa aküm. Maneni lai lar nüburtem meima benshiba

atema teti bilemtettsü. La taküm otsü ajanga, tetsübu makai timtem tekangshi nung aliba nüburtem atema bendanga agüja inyakertem teti ajungmesotsü, ta Angh-isa ashi. "Nagaland nung aliba nüburtem aser kü tenüing nung ni asür kibong den asükhu lemsateper. Tsüingremi asür kinungertem nem mangyim jashi mapang anisüingzük aser tesunep agüjang ta sarasademtsür aser la tanüla teti tatem makadak anisüingzükdakjang," ta Angi-i kasa sangdong ajanga lemsatep.

Naga Hospital colony nung COVID-19 test sample benden



Kohima, Monupii/May 15 (TYO): COVID-19 tashidak tali prokshia aoba atema tebilemtsü kaa COVID-19, District Task Force (DTF) Kohima aser Chief Medical Officer (CMO) Kohima-i Naga Hospital colony nung tanü COVID-19 tendangtsü atema random sampling collection sentong ka ayongzüka agiogo. Naga Hospital Colony Panchayat aser Youth Organisation-i mepeshiba sülen

iba sentong ayongzüka agi. Iba osang lensatepba mapang Naga Hospital Colony Youth Organisaiton tir Vikehelie Suohu-i, dokan amener aser colony nung alir 41-i pei mulungka nung arua sample agütsüogo aser item sample tem tendangtsü atema benerogo, ta ashi. Paise, hopta ka state ajung amokdanga ayutsü tetuyuba agütsür mezüingbuba anogo tesunep nung süitemogo, ta metetdaksü.

State Labour Department-i metetdaksür

Dimapur, Monupii/May 15 (TYO): Wara pokteter aliba ajanga linük ajunga nung state ka nungi state kati mapa i n y a k e r t e m senzüseningpongtepdar. Anungji item nisungtem nem teyari agütsüsü atema Ministry of Labour and Employment Government of India tetuyuba dak ajemdaker Nagaland State Labour Department-i, district ajak nung Assistant Labour Commissioner office nung facilitation centre lapokogo. Anungji Inter State Migrant workers, shirnok tanga state nungi arua tang Nagaland nung mapa inyakdar aser shirnok tanga state nung mapa inyaka

aliba Nagaland-i arur lir, parnok dang pei district nung facilitation centre tem nung pei tenüing züingoksemtsü atema metetdaksüogo. Department-isa, item nisungtem anioka mapa inyakdakja alirtem dang pei kübok inyakertem facilitation centre tem nung tenüing züingoksemdaktsütsü atema teyaru agütsüsü metetdaksüogo. Maneni shirnoksa facilitation centre tem nung tenüing züingoksemogo, parnok nem nüingdakba mapang teyari agütsüsü atema department-i asadangtsü, ta kasa sangdong ajanga metetdaksü.

| NAME OF DISTRICT | CONTACT NO |
|------------------|--------------------------------------|
| Dimapur | 8787602389 / 9615360372 / 8730995556 |
| Kohima | 7005162699 / 9774416227 |
| Peren | 8787602389 / 8787826910 |
| Wokha | 8787859980 / 7005641810 |
| Mokokchung | 7005056648 / 8787811889 |
| Zunheboto | 7005374221 / 9599871962 / 6909969111 |
| Mon | 9402858335 / 9612400402 |
| Tuensang/Noklak | 9862678514 / 9856974152 |
| Phek | 7005684996 / 8257848662 |
| Kiphire | 8131091264 / 9862141681 |
| Longleng | 8014635916 / 8974706544 |

Assam CM Himanta-i Tinsukia nung grenade apokdak semdang



Assam chief minister Himanta Biswa Sarma-i Tinsukia district kubok Tingrai Bazar nung grenade apokba tesem reprangba noksa nung angur.

Tinsukia, May 15, 2021 (Agencies): Honibarnü Assam chief minister Himanta Biswa Sarma-i Tinsukia district kubok Tingrai Bazar semdangogo.

Hokolbarnü iba tesem nung grenade ka apokdang nisung ana asü aser ana yirua liasü.

Tasür anaji Sanjit Singh (25) aser Surajit Talukdar (22) na liasü aser tenaprong Tingrai tesem nung telidak liasü.

Maneni, iba lendong nung Monjit Das aser Ganasyam Agarwala na yiru aser tena

Dibrugarh nung aliba Assam Medical College Hospital (AMCH) nung anepaludar.

Tingrai nung tanü chief minister Himanta Biswa Sarma-i osangbener den jembidang tai maketba nisung ana tepsetba khukhua aitsü.

"Onoki iba mapa inyakterem merenshitsu. Kechi südir süaka tensa meraksatsüla. Iba tesem nung alir ajak dang tensa meraksatsü mepishir. Onoki iba ama inyakyim kodanga magizüktü" ta paisa metetdaksü.

Külen, Assam sorkari tasür kibongtem nem Rs 5 lakh teyari agütsüsü metetdaksüogo.

Tanü Union minister Rameswar Teli, Digboi MLA Suren Phukan, Tinsukia MLA & cabinet minister Sanjay Kishan, Margherita MLA Bhaskar Sharma aser Naharkatia MLA Taranga Gogoi nungertemi chief minister Himanta meina ao.

Iba mapa ya ULFA(I) ajanga inyak ta police-ibo ashir saka ULFA(I)-i parnok shilem kecha mali ta metetdaksüogo.

Assam nung anepdang 11:00 ako tashi dang dokantem lapoktsü

Guwahati, May 15, 2021 (Agencies): May 16, 2021 nungi anepdang 11:00 ako nung dokan ajak shibangtsü ta Assam sorkari Honibarnü metetdaksüogo.

Assam nung Covid19 kanga putetba atema iba telemtetba agi, ta chief secretary Jishnu Barua-i ashi.

Sorkar aser temelaba agüja aliba garitem dak alaka tanga gari ajak odd-even inyakyim nung senzütsü. Medical emergency dak alaka tanga garitem anepdang 5:00 ako nungi anüngdang 12:00 tashi dang senzütsü aser ibaji District Disaster Management Authority (DDMA)-i ketdangsüa reprangtsü, ta Assam chief secretary-isa metetdaksüogo.

Anüngdang 12:00 ako nungi anepdang 5:00 ako tashi nisung senzüsensongba noktanger.

Item tetuyuba ya COVID-19 azüoktsü atema agütsür, ta chief secretary-isa ashi.

Tanü Assam chief minister Himanta Biswa Sarma-i Dibrugarh aser Tinsukia nung deputy commissioner tem dang curfew mapang nikongdang 2:00 tashi masü saka anüngdang 12:00 tashi melentsü tetuyuba agütsüogo.

Chief minister Sarma-i tanü Upper Assam nung Covid19 tensa reprangdangba sülen iba tetuyuba agütsü.

Assam nung Covid19 tanabuba wara agi kanga mejungi kongshibaji Kamrup Metro district lir aser iba sülen Dibrugarh o Tinsukia nung kanga prokshir.

Honibarnü Chief minister-i Dibrugarh nung Assam Medical College Hospital (AMCH) semdanga liasü.

Mizoram minister RLalzirliana-i mozüki atem meyu



Aizawl, May 15, 2021 (Agencies): Hokolbarnü Mizoram power & electricity minister R Lalzirliana-i mozüki atem meyu ajanga tatishitsu tajung ka sayuogo.

Lalzirliana ya pa kinungtsü aser jabaso na den külemi Covid-19 atema mozü kidang temang anepaludar.

Ki oka meyubaji pa atema tasen masü kechiyong pai par kidang aser tangalena ibala mapa inyaker, ta Lalzirliana-i ashi.

Mizoram nung VIP sobaliba magizüker aser iba jagi minister aikati ki mapa inyakba, public transport mesüra motorbike nung senzüba, lokti nübodoka mapa inyakdak shilem agiba aser Christmas o New Year benjungtem nung lokti chiyungtsü atema sorochiokdak shilem agiba aiben ajangshia aruogo.

"Ni atem meyubaji nurse mesüra doctor tem maaksüdaksütsü atema masü saka tangar nem angazükdaksütsü atema liasü" ta Lalzirliana-i ashi.

Parnok amongba taktang memerük liasü aser iba jagi pai sweeper aja saka marutetba agi pai atem meyu ta paisa shisem.

Taoba mapang Delhi-i aodang pai Mizoram house indang atem meyuogo, ta Lalzirliana-isa metetdaksü.

May 11, 2021 nü arishi küm 71 tain Mizo National Front (MNF) lennir aser pa kinungtsü Lalthangmawii (59) na dak Covid-19 aliba puteta liasü.

Tena jabaso dak May 8, 2021 nü Covid-19 putet aser iba jagi parnok ajak home isolation nung liasü

Ajisüaka, Lalzirliana temang nung oxygen level ajema akümba sülen May 12, 2021 nü parnok Zoram Medical College (ZMC)-i anir ao.

Chief minister Zoramthanga-i aniba Mizo National Front (MNF) sorkar nung Lalzirliana-i Power & Electricity mapa dang masü saka Arts & culture, land resources, soil & water conservation, aser district council & minority affairs portfolio tem bona lir.

Diphu nung lanur ka khasat

Diphu, May 15, 2021 (Agencies): Honibarnü Diphu nung lanur ka khasat. Iba lendong ya Haticamp, Dhansiri road nung atalok.

Tasüsangji Debojit Sinha ta jangjaogo aser pa ya Diphu kubok Sitalabari nungi liasü.

Debojit ya motorbike ka nung tetsür medemer ka anir Diphu nungi Dhansiri tsütsüi

aodang, nisung kati lenmang tom nung anendaksür Debojit khasat.

"Küna Dhansiri-i aotsüba liasü saka menuadokba den ano lockdown mapang tenzüktü asüba agi Diphu-i meyipa arutsü lemtet" ta tetsürlai ashi.

"Ajisüaka, nisung kati küna sülen anidak aser lenmang

nung anendaksü. Onok tebilemba tamajung nung yangi aru aser onok ama nisungtemi linük raksatsür ta pai ashi aser iba sülen Debojit dak injang khaloktsü" ta laisa metetdaksü.

"Injang asem tashi khaloktsü. Iba ya kechi atema inyak'ar memetet saka onoki bushisüngdang südar" ta police ketdangsür kati ashi.

Manipur nung journalist aser activist apu



Imphal, May 15, 2021 (Agencies): Manipur nung journalist Kishorechandra Wangkhem aser activist Erendro Leichombam na police-i puogo.

Brihostibar nikongdang Manipur BJP president Prof Saikhom Tikendra Singh asüba dak sendakba nung Facebook nung osang kar lemsatepba atema tena anema ken o tem benoka liasü.

BJP general secretary P Premananda Meetei aser BJP vice-president Usham Deban nati FIR ji benok aser tena May 17, 2021 tashi police ket nung ayutsü ta osang angazüker.

"Nashi scü aser nashi natzü agi na taneptsü mangua na? Kuli kecha makai tokteper anisüngzükgamma. Ni asüng ango achitsü" ta Wangkhem-i par oshi agi Facebook nung metetdaksü.

Külen, Activist Erendro-ia Facebook nung "Corona atema taneptsüji nashi scü aser nashi natzü masü. Taneptsüji science & common sense. Professor RIP" ta zülu.

Manipur BJP president Prof Tikendra ya Brihostibarnü Shija Hospital nung COVID-19 ajanga asü.

Taoba mapang Kishorechandra Wangkhem

asir Erendro Leichombam nati aiben social media nung ashishitep aketba olentem lemsatepba atema puogo.

2020 küm Wangkhem-i Facebook nung Maram kin anema olen ka lemsatepba atema apu. 2018 nunga pai Manipur Chief Minister aitsüba atema National Security Act kubok tai tonglokja apu.

Külen, 2018 küm activist aser Peoples' Resurgence and Justice Alliance (PRJA) party convener, Erendro Leichombam-i telok balala tsüngda tsükchitep adokdaksüba atema tai tonglokja apu.



TIR YIMYIM YIMOBILEM (EDITORIAL)

DIMAPUR AMUNGNÜ, MONUPII (MAY) 16, 2021

Metsübutsuba tashi aser temeim

Asenok ajak tang ya corona tashidak tsübuba mapang lir. Nisung tsütsü nungi aji tetsübula tsübur, kechiyong ibai tasütsü tashidak, kanga tesashi wara ka lir. Ajisüaka, Laishibaibo ashir, Tsüngremi asenok nem tetsübu tanüla agütsü masü saka kecha metsübutsuba tashi ain, temeim shisatsü aser tekolok shitak agüja lir. Iba osang tajung ya asenoki 2 Timoti 1: 7 nung shia angur. Iba Laishiba takong nung ya tetsübu ya tanülaa ta ashir aser aji shitak, kechiyong asenoki tsübua bilemba ya tenük agi mangur aser teka agi amdangtsü makoker, anungji asenok tsübua bilemba ya tetsübu tanüla ka agi tsübudaktsür aser iba tetsübu tanülaji Yisui yokba tanüla masüa ta tenyar Paul-i Timoti dang ashiba iba Laishiba tekong ajanga angatetdaksür. Atangji, tenyar Paul aser Timoti nunger mapang, parnok sayutsungia jajaba limatem nung Yisu Khrista osang tajung sangdonga jajatsübaji kanga tetsübutsuba liasü. Yisu Khrista osang tajung anemertemi Paul pua reshikangshiba, long agi onseta sudadaktsütsü merangba aser tepuokdak yur kangshiba mapatem ajak Timoti-i meteta dang liasü aser ashiko, paa kasa timtem reshikangshi aser tasüba ajurutsü südi ta tsübua bilemba ngua, Paul-i asangur Timoti tasü itshidakja iba Tsüngrem o ya ashi südi ta angatetter. Asenok Khristan-tem asoshi Lashiba tsübutsuba ashijabai tanga kecha masü saka Tsüngrem tsübutsuba indang dang shia lir. Aji oda, Mathi 10:28 nung , " nü tanüla masü saka temang kisung samatsütsü purtem tetsübu saka shibai nü temang aser tanüla na prongla molumi nung samatsütsü akoker, pajiang tsübuang," ta Yisui asenok dang shia lir. Ajisüaka, asenok aikati Tsüngrem masü saka asenok temang kija samatsütsü akokba nisung tamajungertem mesüra tashidak tamajungtemang tsübur. Iba jagi asenoki aiben Tsüngrem peladaktsütsü melen nisungang peladaktsütsü meranger aser Tsüngrem dak temulung alemtsü melen nisung dakang temulung alemer. Aji oda, aiben asenoki shi temang ya asütsü mesüra samatsü tsübuba agi asen kümzükba taküm Tsüngrem masü saka tangar tsüngrem bushia oagi külemer aser asen temang nung yin enoker aser lisü mesülöker. Ashiko, tanüa asenok karbo Corona tashidak nungi kümzüktsü asoshi Yisu dak amanger masü saka tangar tsüngrem külemertemi agütsüba long, yin aser lisü dak dang amanga alitsüa akok. Iba jagibo asen temang dang masü saka tanüla dena samatsü ta Laishiba ashir. Aji oda, asenoki Tsüngrem dang nungibo tashidakang tetsübuba aküm nungji, asen tetsübuji tashidak dang nungi tuluba küma asenok shisabolur aser tashidak agi masü saka tetsübu tanüla jagi asenok kangshir aser samatsür. Atangji, asenok shingaia asen tarutsü tia meteta mali, iba jagi ratar aser shisabolur. Ajisüaka, asen kolak nung ku jang kata Tsüngremi memeteti metsüktsü ta Luke 21:18 nung Yisui ashiba asenoki bilemtetdi. Aji oda, iba lima nung Tsüngremi asenok nungdakba mapang tashi asenok shi temang mesamatsü saka kodang asenok iba lima nung menüngdaklir, Tsüngremi bener aotsü, kechiyong Yob 1:21 nung Yobi ashi ama, asen taküm ya Tsüngremi agütsü aser Paisa bener aotsü. Iba jagi kodang asenok tamang agi angatetdir, asenok temang shi samatsü tsübuba tanüla asenok dak malitsü aser Tsüngremi agütsüba kecha metsübutsuba tashi aser temeim tanüla jagi asenok tasü itdaktsütsü. Aji oda, kodang asenok nem Tsüngremi tetsübu akoktsüsa tashi aser tanüla ka agütsüdir, asenok tsübua alitsü melen Tsüngrem meimba shisatsü agi kecha metsübu akümtsü aser temeim mapang inyaknüsüsa tangatetba tajung ka asenok kolok dangi arutsü ta Paul-i Timoti dang ashijabi tanü tansa Tsüngremi asenok dang ashi amai asenoki agizükdi. Atangji, Laishiba ashir, ajak dang temeimsa tulutiba. Tetezü tetsübu tanüla dang nungi temeim tanüla aser tashisa tuluba. Temeimibo metsübur aser mesempar. Tetsübu yabo süitemtsü saka temeimbo mesüitemtsü. Iba temeim tashiji tanü asenok ajak asoshi kanga nungdaker. Iba jiang asenok shi temang aser tanüla na prongla kümzüktsüba oxygen-ji asütsü.

OLEMSABANG

AROGO ASER LAISHIRI YAMAI CLEAN ELECTION NUNG SHILEM AGIDAKTSUNER

- Dr. T. Jamedi Longkumer, Assistant Professor,
Dimapur Government College

(Yashi adok nungi...)

Arogo aser Laishir Shilem

Mizoram Arogo aser Laishir lenisüba nung clean election takok ngua inyakba ama Naga lima nunga takok angutsü atema itemi nungdak ta bilemer:

1). Arogo aser Laishir lenisübaji nüburtemi agizükttetsüsa asertemulunglemtetsüsa asütsüla.

Kechiba Naga nungertemi NBCC/ABAM-i ayongba clean election campaign principles aser practices magizüker aser election ana tashi nung tejen yimya nungdang, sen aser tashiyim amshia election agi? Arogo aser Laishiri ashiba kechiba nüburtemi tashi manger? Nüburtemi hau ta magizükba Arogo aser Laishir dak temulung malemba ajanga asü? Arogo aser Laishir lenisüba nungji tajitetsü (questionable/doubt) langka lir asü? This calls for introspection and reflection. Iba olong rajemtsü atema ni Billy Graham quote südi (Nearing Home), "We cannot pretend to be something we are not; a Christ-like character cannot be faked. If Christ is not real to us or if we haven't learnt to walk with Him and submit our lives to Him every day, then our spiritual impact on those who follow us will be far less than it might have been ... people are very sensitive to hypocrisy; if they sense it in us, they will dismiss our pretences and pay no attention to our advice. On the other hand, if they can sense (that) our faith is sincere and our love is authentic, then they will respect us and take us seriously (even when they know we are not perfect)." Tanü asen Arogo aser Laishir kong nokdaka lir? Khrista ochiba, temeshiba, tekümet, yimjung, temeim, temulung lemtetba, ajemaluba, tazüokba, tashi aser shisatsü nenok dak nüburtemi ngudar ma? Tsüngremer raraba sobutsü ajak (armor of God), Efesa 6 nung zülua aliba to, abensa asen Arogo aser Laishiri sübo nungdang CEC wadang jeta koka inyaktetsü. Trustworthy leadership is the need of the hour.

2). Naga/Aor lokti stakeholders aser nüburtemi Election merüka agitsütelemtetba agitsüla - a SOCIAL CONTRACT on Clean Election is required.

Arogo aser Laishirianir social discourse Naga nunger/Aortem rongnung alitsüla aser election merüka agitsü atema social consensus aser agreement generate asütsü mapa inyaktsü nungdak. Sen aser tashiyim amshia election agibaji Naganunger/Aortem ajak asoshi takoksa (shinga majangzüker) ta asen nüburtemi angatetsüla aser itemmemerükba alima shi-azü mapa indoktsümulungtettsüla - ibala ama 'social contract' (arok lokti telemtetba)ka meyanglu nungbo temelenshi bener arutsü makoktsü. Clean election campaign can be a success only when the people embrace self-examination, purify themselves and decide to live for what is right and true. It can come about only through people transformation. After all the election corruption is just an opportune manifestation of the moral rottenness within - lust for money, power, self-interest and pride- evils ruling the hearts and minds of our people. Meimchir mulungjang nung temenen tera alibaji atsüteta indoktsü mulungtet nung dang tajung inyaktsü lenmang lapoktsü. Iba 'tekümet' mozüji Arogo aser Laishirtemi Temeshi Laishiba nungi Tanela Temeshi leniba aser tashi nung nüburtem nem agütsütsüla. Kodang civil societies, political parties aser nüburtemi (general public) election agiba yimya merüktetsüla ta angateta iba mapa nung shilem agitsü (participate) mulunga kümdir idangjiang clean election campaign takok angutsü.

1. Mizo People's Forum ama clean election maparen/agenda implement süa monitoring mapa inyaktsü atema organized body ka tentetsünungdak.

CEC inyakyim sentong atonga mapa küma inyaka aotsü atema organization tajung ka nungdak. Iba organizationji efficient aser above reproach (tarak maket) bangdak asütsüla. Tetezü iba bangdak lenirtemji nüburtemi hau ta agizükttetba nübu asütsüla (leadership that inspires confidence, trust and action). Asen lima nung lenisüba mendenji aiben pei self-interest aser self-benefit atema dang amshiba ajanga asen lokti raksar, timatemer aser lokti tejakleni maoer. Mizoram nung CEC takok anguba tongtipang reasonji Arogoi nungita yariba Mizo People's Forum-i ochi/upright aser tebandang maliba/impartial leadership agütsüba ajanga lir. Mizo Arogo lenirtemji nüburtemi akhümtsübur kechiyong parnok Tsüngrem tsübur aser Temeshi Laishibatesayuba ama taküm alir. The Mizoram experience with clean election campaign has been successful to a large extent mainly because the Church and its affiliate Mizo People's Forum is very clear about what is and what is not acceptable. The Mizo Church has been fighting against corruption and this has encouraged people to raise their voice against what is wrong. It does not compromise even with VVIPs or moneybags.

(Maneni asung adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

US State Dept-i International Religious Freedom Report sayaogo



May 12, 2021 nü Washington D.C. nung U.S. Department of State-i 2020 küm indang International Religious Freedom (IRF) Report sayaba sentong nung US Secretary of State, Antony Blinken-i osangbenertem den jembidang tangokba noksa nung angur.

Washington D.C., May 15 (Agencies): May 12, 2021 nü U.S. Department of State-i 2020 küm indang International Religious Freedom (IRF) Report sayaogo, aser iba report nungji alima tesem balala nung tamangba yimsü temeden anema inyakba aser yimsü nung ajemdaker reshikangshiba osang metetdakja lir.

Iba report nung US State Department-i Saudi Arabia, Nigeria aser China linüktemi maneni nüburttem anema inyakba atema aitsüba den külemi United States-i maneni alima nung religious freedom atema inyaksü, ta metetdakja lir.

Osangbenertem senden ka nung International Religious Freedom (IRF) Report sayaba mapang US Secretary of State, Antony Blinken-i iba report indang lenla ajak metetdaksü.

Paisa, "Religious freedom ya meimchirtem temeden ka lir; atangji meimchir ka jenjangji angatetsüla. Religious freedom ya meimchir ajak atema temeden ka lir. Tesem ajaklen aser nisung ajak nem iba temeden agütsütsüla. Kong lidir liaka, kechi amangdir amangaka mesüra mamangaka iba temeden ya ajak nem agütsütsüla," ta ashi.

Iba report nungsa India indanga shisema lir. U.S.

Commission on International Religious Freedom-i India linük ya Country of Particular Concern (CPC) linüktem rongnung züngoktsü atema US State Department matsüngdang benoka liasü saka State Department-i magizük.

Ajisüaka International Religious Freedom report nungji India nung maneni Khristantem densema nütsüng ajema aliba yimsütem reshikangshiba indang shia lir.

US State Department-i International Christian Concern (ICC) den o lemtepbapang nung India nung police ochimashi aser tamangba yimsü minorities anema covid tenokdangbatem benokba indang jembiba-a shisema lir.

"Melungtet telok-International Christian Concern-i ashiba agi, coronavirus prokba nokdangtsü atema linük shibangba ajanga Uttar Pradesh nung reshikangshiba ajema akümtsü ta bilem, ajisüaka wara anema tenokdangbatem agienba sülen Khristantem anema inyakba tali aküm," ta report nungji shia lir.

IRF Report nungsa Turkey nung religious freedom anema inyakba indang shia lir. Joe Biden administration-i Turkey linük dang linük nung Khristantem reshikangshiba

anentsü atema ajungshi tenzükogogo. Turkey nung Protestant Arogotem den sendaktepa aliba Khristantem maneni linük telungi maitdaktüba aser item ken o aika court nung anendaka aliba indang ICC-i metetdaksüba osang report nungji shia lir.

IRF report nungsa China linük tesem ajungalen Communist sorkari tamangba lokti balala anema inyakba indang shia lir. Talisa US State Department-i China nung sorkari Early Rain Covenant Church (ERCC) nem timtem agüja aruba aser tawa asüpila sentong ka agiba sülen ketdangsertemi ERCC pastor ka apuba indang report nungji shia lir.

IRF Report dak sendakba nung ICC nung Advocacy Director, Matias Perttula-i, "State Department indang 2020 IRF Report nung United States-i maneni alima tesem ajungalen religious freedom ajungkettsütsü atema inyaksü bangjembaji onoki (ICC) pelaa agizüker. Tanü linük aika nung reshikangshi lir, anungji religious freedom anema inyakertem anema teinyaksü mapa jenti lir. Iba ama tongtibang onük ka nung ICC-i maneni State Department den senteper inyaksü yongyaa atar," ta metetdaksü.

Taküm ita pezü tsüngda Nigeria nung Khristan 1,470 tepsetogo

May 15, 2021: Taküm küm tenzükter mezüngbuba ita pezü tsüngda (January- April) Jihadists kiralongrartemi Nigeria nung Khristan 1,470 tepset aser Khristan 2,200 dak tema puer ogo, ta meimchir temeden atema inyakba telok Intersociety Rule of Law-i metetdaksü.

"Intersociety-i hopta ana tsüngda tang research tasentiba ya agia liasü, aser iba mapang nung linük (Nigeria) nung Khristantem reshikangshiba tesem ajak asadanga liasü," ta parnok indang report nungji shia lir.

"Nigeria nung taküm January ita nungi April ita tashi nung tekümsükter maliba Khristantem 1,470 tashi tepsetogo; iba nungji Jihadist Fulani teloki Khristan 800 dak tema tepsetba densema lir," ta parnokisa metetdaksü.

Intersociety teloki kaket tapak 26 nung renemba report nungji tenük kuli alirtemi ashiba aser lendong nungi kümzükertemi kuli agütsüba densema lir.

Nigeria nung sorkaribo, rara adokba ya tamangba yimsü nung ajemdaker masü saka shiruru mesürtem (Muslim) aser aluyimertem (Khristan) tsüngda

tsükchitepbapang ajanga lir ta ashir, ajisüaka jungjunga bushisüngdangba ajangabo sorkari jembiba amaji masü ta bushitetogo, ta report nung shia lir.

"Nigeria sorkar aser states sorkartemi Nigeria nung Khristantem jenti tepsetba ya tamangba yimsü nung ajemdaker masü saka shiruru mesürtem aser aluyimertem tsüngda rara ajanga mesüra auertem ajanga lir ta shia ochi miimbangtsü meranger, ajisüaka bushisüngdangba ajangabo sorkari jembiba amaji masü ta bushiteteter," ta report nung shia lir.

ANOGO ABEN TSÜNGREM DEN

MEDENAKTSÜBA AZÜH

"Tang khrista züh agi asenok medendaktsü nung idakji chia Tsüngrem ain adokba nungi asenok pa ajanga kümzüktsü". Rom 5:9

Nisung taküm nung kechi mapa nung südir süaka ajaki hau ta mesütetra iba nungji jangratemtsü mesüra tepela ka mali, kechiaser ajaki junger ta agizüktetba jagi temedenba ka agütsür. Adem kodang Yihova Tsüngremi ashiba mangai pei mulungba nung alitsü tenzük iba mapang nungji temenen taitzüba süngrai pa dak alen aser iba taitzüba tanela jagi par kibong nung yimsü südakja kati ka aitsütepa arur tatem nungbo azühdokshitepbapang temenen agi kibongji semdang. Mezüngbuba Adami aibelenba ajanga temenen taitzüba nung alenbanger lia, iba taküm nungjagi alangzüksüba temedenba taküm ka ngudaktsütsü asoshi Tsüngremi taitzüba aser temedenba tsüngda apu ka ala aser aji "Khrista azüh".

Yisu Khriatai senti azüh tenlaba jagi taitzütepbapang temenenji shitoktsü aser Tsüngremi ain adoka temerenshi agütsütsü aliba nungi nisungi nüchi tia dangi anitettsü. Adianu, na temenen taitzüba süngra kari alener ne sasa mekokteti ali asü? Arung aser Khrista züh ajanga shitoka temedenba takümji agiang, süra iba nungjagi Kibubai na kümzüktsü.

SARASADEM

Kibuba Yisu, Ne züh agi shitokja ni temedenba taküm ka kümduksüba asoshi Ne tenüng asanger. Amen

Turkey anüdoklen Tenla ki ka amak

Washington D.C., May 15 (Agencies): May 11, 2021 nü Turkey nung aliba Mehr yimdak mejangjaba nisungtemi Marta Shimoni Arogo Tenla ki amak aser Tenla ki raksatsüogo, ta International Christian Concern (ICC)-i metetdaksü.

Yaküm-a kasa yimdak Chaldean Catholic pastor ka tsüraburtem puer ao. Pastor tetsü, Simoni Diril sür lia angu aser tebu, Hormoz Diril bo tang tashi kong aliar memetet.

Marta Shimoni ya tenemlen lungki chiteta yangluba Tenla ki lir, anungji iba Tenla ki yabo tanga Tenla kitem ama kasa yimya nung meraksatsüteter. Iba Tenla ki telung nungi aliba oset balala- Kangkitem aser Yisu noksa densema oset balala raksatsü.

Tamalen Mehr yimdak Chaldean Khristantem timba liasü saka 1990s tetenzüklen rara ajanga aikati iba yimtoktsür ajen. Küm 11 tejaklen pastor tsürabur anati iba yimdak Khristantem taneben asentenshir alitsü atema yimdaki meyipa aoba sülen Marta Shimoni Tenla kidang tekülem agia aru. Yaküm apuani na puer aoba sülen ita ana lir March 20 nü Simoni Diril tasümgang angu aser la kinüngbu, Hormoz Diril-a süadoker asü kong aliar tang tashi memetet.

ICC den jembidang Attorney, Orhan Kemal Cengiz-i, "Diril'er kibong atema lawyer ka ama aibelenertem anema ken o benoktsü atema prosecutor teyari nüngdaker,

saka Diril (kinüngtsü) tepsetogo aser Diril tang tashi mangur. Tang tashi nung ni prosecutor nem temepishiba shidi 10 dak tema agütsüogo," ta metetdaksü.

Paisa, "Tang tesüsa Tenla ki amakba tatalokba bushisüngdangtsü aser apuani apuba bushisüngdangtsü atema ni prosecutor dang mepishitsü," ta metetdaksü.

Diril apuani na puer aoba ya United States Commission on International Religious Freedom Annual report 2021 aser tawa sayaba International Religious Freedom Report nunga shia lir.

Tang Tenla ki amakba dak sendakba nung Diril'er kinünger kati, "Onok meyong Tenla ki amakba atema ni sashia aitsür.

Tenla ki amakba ya meimchir mesüra tamangba yimsü kecha den-a mapet," ta metetdaksü.

"Yimdak onok lia Tenla ki amakba tetezü nisung kar mepelar, aser onok yangi melidaktsüner," ta Diril'er kinüngerisa metetdaksü.

ICC Regional Manager, Claire Evans-i, "Marta Shimoni Arogo anema inyakba atema onoki tebilemstü akar. Mehr nung Khristantem maneni amokmerener. Diril apuani apuba aser Simoni tepsetba sülen küm ka jungogogo, ajisüaka tang tashi ochi obendang mangur, aser tang parnok meyong Tenla ki amaker. Ozüng alema inyakertem anema meinyakra kodaser Khristantem temelung ulua Mehr yimdaki meyipa arutsü," ta ashi.

OLONG PAITEP # 5813

| | | | | | | | | | | |
|----|--|----|----|----|--|----|--|----|--|---|
| 1 | | | | | | 2 | | | | 3 |
| | | | | | | | | 4 | | |
| 5 | | 6 | | | | 7 | | | | |
| | | | | | | | | | | |
| 8 | | | | | | | | | | 9 |
| | | | | | | | | 10 | | |
| | | | | 11 | | 12 | | | | |
| | | 13 | | | | | | | | |
| 14 | | | | | | | | | | |
| | | | | | | | | | | |
| | | | | | | | | | | |
| | | | 16 | | | | | | | |

TIPIEN

- 1. O jembitsü tashi - 8
- 5. Sünjjang tapu ka - 5
- 7. Tekanük nung enokba - 5
- 8. Teka amtep - 5
- 12. Tzük asendak - 5
- 14. Tsünjjang tema aliba - 5
- 15. Ken atenba yimya - 5
- 16. Asangur - 8

LANGTSÜNGLEN

- 1. Tepok telung nung shilem ka - 7
- 2. Tamajung aküm - 5
- 3. Chi den külemi achiba - 3
- 4. Meimchir alimai aruba - 3
- 6. Laishiba nung ayong ka - 4
- 9. Tarutsü nükla - 7
- 10. Tamendakdak/Nükjildong - 4
- 11. Tenük-telen mejungi aküm - 5
- 13. Terok nungi adokba - 3
- 14. Meimchir telemasa - 3


OLONG PAITEP # 5812 TELANGZÜBA

TIPIEN :

- 1. Taa, 3. Teküm, 6. Aibelen, 7. Aut,
- 9. Ajizük, 10. Ojala, 11. Semer,
- 13. Sen, 15. Kiocksü, 17. Itsük, 18. Kar.

LANGTSÜNGLEN :

- 1. Tai, 2. Asensor, 3. Tanü, 4. Kua,
- 5. Mitsüktsü, 6. Azübenshi, 8. Lah,
- 9. Jangkok, 12. Akok, 14. Nashi,
- 16. Sür.



ALOKBAR KIBONG NUNG PUNGMANG

SHITEPER:

Warakla : Tambu, yasüng pungmang nungbo nai kü nem Diamond ring sen tasak jenjang ka alijaa pungmang ati-i.

Alokba : Iba süleno nia pungmang baji, Iba bill tobo nübui ang agütsüya anguati-i.

Warakla : Oh Alokhangba!

Lilir : WhatsApp

TANÜBO NAI LANGZÜANG

Q. _____ ajanga Dost For Life App saya.

- A.UPSC B.CBSE C.NCERT D.ICSC

_____ (Taruba adok nung onoki langzüksü)

YASHI ADOK TELANGZÜBA : New Delhi

AO OSHI ANGAZÜKDAK:

TANÜ ANGAZÜKTSÜBA OJANG



Tir Yimyim

Ishiba

(adj) tajemba (lesser)

Asenok nütsüng yongsük tamalen dang nungi tang **ishiba** lir.

Ishika

(adj) tera dang (few/ little)

Kütsüi totzü **ishika** alia bener aru.

Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

NAI-A YA METETTER MA?

ALIMA NUNG JENJANG TULU AKETBA FOOTBALL CLUB KAR: 2021

- 1. FC Barcelona - \$4.76 billion
- 2. Real Madrid CF - \$4.75 billion
- 3. Bayern Munich - \$4.215 billion
- 4. Manchester United - \$4.2 billion
- 5. Liverpool - \$4.1 billion
- 6. Manchester City - \$4 billion
- 7. Chelsea - \$3.2 billion
- 8. Arsenal - \$2.8 billion
- 9. Paris Saint-Germain - \$2.5 billion
- 10. Tottenham Hotspur - \$2.3 billion



SUDOKU # 5856

| | | | | | | | | | | |
|---|---|---|---|---|---|---|---|---|--|--|
| | | 3 | | 1 | 5 | 7 | 9 | | | |
| | 8 | 6 | | | 9 | 2 | | 1 | | |
| | | | 2 | 6 | | | | | | |
| 9 | 2 | 4 | 6 | | | | | | | |
| | | 7 | 4 | 3 | 1 | 8 | 2 | 9 | | |
| | 1 | | 9 | | | 6 | | | | |
| 7 | | | 5 | 9 | | | 8 | 2 | | |
| | 3 | 5 | | 8 | 2 | | | | | |
| 8 | | 2 | | 7 | 6 | 4 | | | | |

TELANGZUBA # 5855

| | | | | | | | | | |
|---|---|---|---|---|---|---|---|---|---|
| | 1 | 6 | 2 | 3 | 9 | 7 | 4 | 5 | 8 |
| | 3 | 7 | 9 | 4 | 5 | 8 | 1 | 6 | 2 |
| | 5 | 4 | 8 | 6 | 1 | 2 | 7 | 3 | 9 |
| 9 | 2 | 4 | 6 | | | | | | |
| | | 7 | 4 | 3 | 1 | 8 | 2 | 9 | |
| | 1 | | 9 | | | 6 | | | |
| 7 | | | 5 | 9 | | | 8 | 2 | |
| | 3 | 5 | | 8 | 2 | | | | |
| 8 | | 2 | | 7 | 6 | 4 | | | |

OJANG LUTEP # 5399

- TETIMM :
- KREHUT :
- ERAS :
- TIDATANG :
- LABALA :
- UDAARNG :
- BARTEM :
- MAA :
- AGAKKANANGA :
- ETLITER :

OJANG LUTEP TELANGZÜBA # 5398

TEYARITEPER TAJUNG MALIR NÜBU KA MILONGI SEMPET TAJUNGJI METETA AKÜM

TAN HOPTA ATEMA - KOMA SÜLA ?

Q. Covid mozü kidang inyaker doctor, nurse aser staff-tem asoshi anogo shia chiyongtsü mozü ki anasa aliba arogotemi longjemer agütsü nunga koma süla ?

Cyclone Tauktae agi state 5 kongshitsü



Thiruvananthapuram, May 15, 2021: Tang Arabian tzyüim nung Cyclone Tauktae kümtetba ajanga Kerala yimtiba, Thiruvananthapuram tzyüimkülem tsüsem tulu aruba noksa nung angur.

New Delhi, May 15 (Agencies): Honibar tashi nung Arabian tzyüim nung Cyclone Tauktae ya cyclonic yipru tesashi kümogo, aser iba yipru ajanga Tamil Nadu aser Kerala nung tzyüimkülem lendong ataloktsüa akok, ta asadanteta tekümdangtsü sangdongogo.

Honibarnü Central Water Commission (CWC)-ia state ana nungji tzyüimkülem lendong tulu ataloktsü, ta asadantetogo.

Iba dak alia Gujarat aser Maharashtra natia tzyüimkümlen lendong ataloktsüa akok ta bilema lendong atema mazüngi renemshidar.

Ato kilonser, Narendra Modi-ia Cyclone Tauktae atema sorkar tongti ketdangsertem aser National Disaster Management Authority (NDMA) den review senden ka amentsü.

Ano külen Congress lenir,

Rahul Gandhi-ia party nung inyakertem dang state 5-Kerala, Maharashtra, Goa, Tamil Nadu, Gujarat aser Karnataka nung lendong mapang nungdabapurtem akok tashi yariang, ta tuyu.

Cyclone Tauktae ajanga North Kerala, talisa tzyüimkümlen aliba tesemtem kongshidar, aser item tesem rongnung state yimtiba, Thiruvananthapuram, Kollam, Alappuzha, Ernakulam, Thrissur, Malappuram, Kozhikode, Kannur aser Kasargod densema lir.

Hokolbar aonunga Kerala tesem aika nung mopung sashia aonba den tzyüimkümlen sashia aruba ajanga süngdong aika laoba den power supply raksatsüogo. Iba dak alia tzyüim nung tzyüimkülem tulu ajanga Kerala kübok Thrissur, Malappuram, Kannur aser Kasargod district tem nung kiojen jenti raksatsüdar.

Cyclone Tauktae nung

ajemdaker Mumbai civic body-Brihanmumbai Municipal Corporation (BMC)-i COVID-19 vaccination drive anena atar aser May 15-16 anogotem nung sorkar vaccination centres ajak shibanga atatsü.

Iba yipru mapang kümziükba maparen inyaksü aser relief agütsütsü atema National Disaster Response Force team 53 lemsüki liasü saka tangbo team 100 kümtsüogo.

NDRF Director General, S N Pradhan-i twitter ajanga, NDRF team 100 ji Kerala, Karnataka, Tamil Nadu, Gujarat, Goa aser Maharashtra tzyüimkümlen mapa lemsükiatsü, ta metetdaksü.

Hokolbar aonung India Meteorological Department (IMD)-i, iba cyclone-i Kerala, Karnataka, Lakshadweep, Goa aser Maharashtra kongshitsü aser May 18 anepdang tashi nung Gujarat tzyüimkümlen kongshitsü, ta metetdakja liasü.

Aluyimertemi longkak ait tenzüker ita 6 ajunger; 'Black Day' amongtsü

New Delhi, May 15 (Agencies): India nung aluyimertemi Centre sorkari benokba aluyimba ozüing tasen asem anema Delhi arrtsülen longkak ait tenzüker ita 6 ajungba nungtem nung parnoki May 26 nü 'black day' amongtsü.

Honibarnü aluyimer organisations 40-i tentetba Samyukta Kisan Morcha nung lenirtemi sangdong ka ajanga, May 26 nü aluyimertemi longkak aita pei kidang, garitem aser dokantem nung wako tanak asongtsü, ta metetdaksü.

Video conferencing ajanga osangbenertem senden ka nung jembidang aluyimertem lenir, Balbir Singh Rajewal-i, "Onoki longkak ait tenzüker May 26 nü ita trok ajunger; kasa anogo nungsa Ato kilonser leniba nung sorkar tenteter küm 7 ajunger. Iba anogo ya onoki 'black day' ta sangdonga amongtsü," ta metetdaksü.

Uttar Pradesh, Punjab aser Haryana nungi timba ser state balala nungi aluyimertem Delhi

arrtsülen adenshir yaküm November ita nungi tenzüka Centre sorkari benokba aluyimba ozüing tasen asem anema longkak aita arudar.

Iba tebilemetsü onük bentettsü atema aluyimer lenirtem aser Centre sorkar na tsüngda senden aiben mena aruogo saka telemtetba kecha magitet. Aluyimertemi ozüing asempronglaji agientsü tekong meranga akhanger, saka Centre sorkaribo ozüing asemji magientsü saka tera yanglushitsü atema dang mepishir.

May 26 nüji aluyimertemi dang masü saka temelungertemia black day mongdaksüner, ta Rajewal-i mepishia metetdaksü.

"Onoki linük nüburtem aser Punjab nunger dang pei ki, dokan aser garitem nung wako tanak asongtsü mepishir. Kasa anogo nung onoki longkak aita (Ato kilonser) Narendra Modi mesüka yangluba noksatem rongdoktsü," ta Rajewal-i metetdaksü.



May 15, 2021 nü Delhi nung Israel Dy Ambassador, Rony Yedidia-i tawa Israel nung rocket agi pokseta asür Soumya Santhosh nem akhüm agütsüdang tangokba noksa nung angur.

UP aser Bihar kübok Ganga ayong nung tasü mang 2,000 nguogo

New Delhi, Monupii/ May 15 (Agencies): Tesüiba hopta ka tsüngda Uttar Pradesh aser Bihar na nung district administration balalai Ganga ayong nung tasü mang 2,000 jungnüa ngutetogo, ta Honibarnü Union Home Ministry-i metetdaksü.

Ketdangsertemi ashiba agi, asürtemji timbaka Ganga ayonglen aliba yimtsüngtem nung coronavirus tashidak agi asürtem asütsüa akok. Yimtsüngtem nung timbaka kanga sensakertem lir, anungji asipila sentong agitsü atema parnok ket nung senotsü maliba agi tasü mangtemji Ganga ayong nung inoktsü asütsüa akok.

Uttar Pradesh aser Bihar na

tsüngda Ganga ayong ya kilometer 1,400 dak tema lir.

Tawa Ganga ayong nung tasü mang aika anguba sülen ayong nung tasü mang indokba nokdangtsü atema Union home ministry-i Uttar Pradesh aser Bihar sorkartem den tongtepratepa inyakdar, kechiyong ayong nung tasü mang indokba ajanga state ana nungji ano iba wara taliba proktsüa akok ta bilemer.

Ministry osang ajanga angazükba agi, tasü mangtemji timbaka Kanpur, Ghazipur, Unnao aser Balia district tem kübok yimtsüngtem nungi indoker aser tasü mangji Bihar tonga tzyü nung ponger alur. Home Ministry-i state anaprong

dang Ganga ayong nung tasü mang indokba nokdangtsü atema tangsa mera agia inyakang, ta tuyuogo.

Ganga ayong nung tasü mangtem apongdeka anguba sülen tasü mang timbaka asüpila sentong agir rongdokogo. State ana nung police tem dang Ganga ayonglen patrolling senzütsü aser yimdaklirtem dang tasü mangtem ayong nung mindoktsü atema awareness agüjang ta tuyuogo.

Anogo ishika tejaklen Bihar ketdangsertemi bo, tasü mangtemji timbaka Uttar Pradesh nungi ponger alur aser Balia anasa temdaker, ta metetdakja liasü.



Kanyakumari, May 15, 2021: Honibarnü Kanyakumari district nung tantsür kati Tamil Nadu sorkar indang Corona Relief fund kübok mezüngbuba installment sen anguba sülen menüremba noksa nung angur.

India nung ano Covid agi nisung 3,890 süogo

New Delhi, May 15 (Agencies): India nung ano nisung 3,26,098 dak coronavirus putet aser ibaji densemabo tang tashi nung linük nung nisung ajak agi 2,43,72,907 dak coronavirus putetogo, ta Honibarnü Union health ministry data ajanga metetdaksü.

Tesüiba ghonda 24 tsüngda nungsa iba tashidak agi nisung 3,890 süogo, aser ibaji densemabo linük nung iba tashidak agi asür ajak senteper 2,66,207 jungogo.

Tesüiba anogo 23 tashi India nung anogo shia nisung lakh 3 tema dak coronavirus puteter aser tesüiba anogo 17 tashi iba tashidak agi nisung 3,000 dak tema asür, ta Honibarnep 8:00 ako nung Health Ministry-isa

metetdaksü. India nung anogo ka kija nung coronavirus tashidak agi nisung timtiba asübaji May 12 nü nisung 4,205 asüba liasü, aser anogo ka kija nung nisung timtiba dak iba tashidak putetba anogoji May 7 nü nisung 4,14,188 dak putetba liasü.

Tang tashi nung linük nung nisung 18,04,57,579 nem coronavirus vaccine agütsüogo, aser iba nungji tesüiba ghonda 24 tsüngda nisung 11,03,625 nem vaccine agütsüba densema lir.

Honibarnü Indian Council of Medical Research (ICMR)-i ashiba agi, May 14 nü tashi nung samples ajak agi 31,30,17,193 tendangogo, aser iba nungji Hokolbarnü samples 16,93,093 tendangba densema lir.

Gaza nung Palestine nunger asür 126 jungogo



Spanish U.N. peacekeepers temi Lebanese-Israeli arrtsü nung Lebanon tsütsü arrtsü nung aliba Kfar Kila yimtsung meita ataba noksa nung angur. Lebanon den Israel arrtsü nung anüolen tip len Israel nunger sepaitemi Hokolbarnü Lebanon aser Palestine nunger longkak aiter telok ka dak injang khaloktsü. Longkak aiter temi atsü rakpoker arrtsü adena liasü

Gaza City, Monupii/May 15 (Agencies): Anogo ka tepeyong West Bank nung azütokshiba den Israel nung tensa mejungi mesüngjemteti aliba sülen Israel nunger fighter jets temi manger mesangwa tsüngda central Gaza nung tesem balala maka liasü, ta army-i Honibarnü metetdaksü.

Gaza nung Israel aser Palestine nunger telungpurtem tsüngda anogo pongu tashi raraba anendaktsütsü atema inyaktepba mapang ka nung Israel air force-i maneni manger mesangwa tsüngda iba strip nung tesem aika amak aser telungpurtemia Israel dak rocket khalokja liasü.

Gaza amakba sülen tang tashi nung tanur 31 densema nisung 126 süogo aser nisung 950 yiruogo.

Küm tem tsüngda Israel nung tang Jew aser Arab

nunger tsüngda mangatettep adoker aliba azüoktsü merangba mapang ka nung Palestine nunger litsü nunga mangatettep tulu adoker lir.

Hamas aser Palestine nunger tanga teloktemi Jerusalem dak rangloker rocket khaloktsüba sülen Hombarnü nungi tenzüka Gaza nung bomb poklokja arudar. Hombarnü nungi tang tashi nung Israel dak rocket 2,000 dak tema khaloktsüogo aser iba mapang tanur ka aser sepa ka densema nisung teku süogo aser nisung 560 dak tema yiruogo.

Israel-i meyiper tesem 800 shi makogo, kong Hokolbarnü civilian tem aliba tesem nung Hamas puri parnok senzügenpong atema ali telung nung lenmang tua or aliba densema lir.

Tower aser ki tem lenden kümtsüogo aser iba ajanga

Gaza nung aliba kibongtem school aser mosque tem nung jenoktsüsa kümogo.

"Tanurtem ajak tsübuteper aser onok tanürtem atema tsübur," ta Kamal al-Haddad-i ashi, shiba par kibong den Gaza City nung UN-i teyari agütsüba school kati jenaogo. Honibarnü anepdang Israel army-i ashiba agi, parnoki Gaza City teyong anasa Hamas "operation office" ka makogo.

Honibarnü anepdang tashi Israel anüolen tip nung Air raid warnings agütsüogo. 2014 küm sülen Gaza nung tang rara tesashitiba adoker lir.

Kasa mapang nung Jerusalem anüdoklen aliba Shuafat tesem nunga Palestine nunger longkak aiter temi tesem aika nung mi senokja police den mangatettep adokba sülen iba tesem nunga tensa mejungi lir.

China nung yipru ana atonga ait; nisung 10 süogo

Beijing, Monupii/May 15 (Agencies): China teyongtsü aser anüdoklen yipru ana atonga aruba sülen nisung 10 süogo aser nisung 300 dak tema yiruogo, ta official aser state media sangdong ajanga Honibarnü metetdaksü.

Iba yipru lendong nung Wuhan yimti nisung trok asü aser Jiangsu province kübok Shengze jila nung nisung pezü süogo, ta local government sangdong ka ajanga metetdaksü.

Yipur mezüngbubai Hokolbarn aonung 7 ako shi nung Shengze dak kongshi, kong factory tem raksatsüba

den electricity facility tem raksaja liasü, ta official Xinhua News Agency-i ashi. Suzhou yimti sorkari social media post ka ajanga ashiba agi, iba yipru lendong nung nisung pezü asü aser nisung 149 terara yirua liasü. Shengze ya China anüdoklen tzüküm nung Shanghai yimti anasa lir.

Iba sülen 8:40 ako shi nung yipru tanga kati Wuhan dak kongshi, kong ki metsü dak tema raksatsüogo aser electricity raksatsüba ajanga kibong 26,600 dak kongshia liasü, ta Xinhua-i metetdaksü. Wuhan sorkari ashiba agi, yipru lendong nung nisung trok asü aser nisung

218 yarua liasü.

Xinhua sangdong ajangasa ashiba agi, Wuhan nung ki 27 chirep aser ki 130 shi raksaja liasü. Construction site nung kitem aser crane ana raksago aser power line raksaba ajanga electricity makai aküm.

Noksa ajanga Hokolbarnü aonung ayaterem süier Wuhan yimti nung tekümzükertemi ki chireper aliba tem nung nisungtem kümzükba aser Shengze nung anepdang factory ka nung merangmerutem merektetba nguogo.

Wuhan yimti nung ya 2019 küm mezüngbuba Covid-19 tashidak poteta liasü.



Iran judiciary tekolakba Ebrahim Raisi-i, Tehran kübok interior Ministry nung tir menden atema tokteptsü atema pa tenüng züngoksemogo. Election ya June 18 nü agitsü.

Temeshi ita amungba mapang Tibet nungertem nem tenokdangba agütsü

Lhasa, Monupii/May 15 (Agencies): Lhasa nung aliba Tibet nunger dang temeshi ita; 'Saga Dawa' mapang tamangba yimsü nung inyakyim kar azüoktsü atema tetuyuba agütsüogo. Iba tetuyuba agütsüba ajanga China nunger ketdangsürtemi Buddhist nungertem tamangba yimsü nüjiso azüoktsü merangba ama reprangteter.

Phayul news portal sangdong ka ajanga ashiba agi, Lhasa City Buddhist Association-i May 9 nü iba tetuyuba agüja liasü. Tibetan calendar nung ita pezübuba ya Buddhists temi temeshi ita ta züngshir, koba Bodhbarnü tenzüko.

Coronavirus tashidak menatepa aoba nokdangtsü atema iba tetuyuba agütsüogo, ajisüaka Lobby aser activist group International Campaign for Tibet (ICT)-i, Tibet nungertem tamangba yimsü nüjiso azüoktsü atema nükjidong yur iba tetuyuba agütsüogo, ta bilemer.

"Wara süshia mao asünung coronavirus tashidak nungi jenboa alitsü atema jenjang agibaji tim dang, ajisüaka Lhasa

nung ketdangsürtemi Tibet nunger Buddhists yimsü dak amangertem parnok temeshi ita amungba mapang parnok inyakyim azüoktsü atema iba maongka agir," ta US nung amendaker aliba teloki ashi.

People's Republic of China (PRC) constitution ajanga ashiba agi, lisopurtem nem tamangba yimsü dak sendakba nung nüjiso agüja lir, ajisüaka tamangba yimsü inyakyimtem tajemba küm daksür, ta US State Department-i iba hopta sangdongba International Religious Freedom, 2020 Report nung shia lir.

Report ajanga ashiba agi, CCP inyakyim kübok China nungertem ketdangsürtemi temelaba agütsür aliba tamangba yimsü inyakyimtem nung shilem agidaktsür aser parnok inyakyim ajanga national security dak mekongshitsüla.

Maneni CCP-i Tibet nunger Buddhism dak amangertem inyakyim ajak azüoker, kong tesem, telok, kija, aser school densema lir aser temalen nungi tanga tashi kati azüokba magizüker, kong Dalai Lama densema lir, ta kasa sangdong ka ajanga metetdaksü.

India nungi Australia nunger 72 anir aruogo



Darwin, Monupii/May 15 (Agencies): India nungi Australia nunger 70 dak tema anir Honibarnü linük anüdok tiplen yimti ka nung anenogo. India nungi tayimtsü ka danga marudaktsütsü atema tenokdangba agütsüba sülen tang mezüngbuba tayimtsü ka Australia tongaogo.

Iba tayimtsü ya Honibar anepdang Darwin nung anen. Tayimtsü nung New Delhi nungi nisung 72 anir ao, ajisüaka parnok nisung 48 dak Covid-19 tashidak potetba sülen parnok ka danga tanga tayimtsü nung aotsü memelar.

Mezüngbo nisung 150 anir aotsü sentong liasü, ajisüaka nisung tesadang dak tera tali dang tayimtsüi atutsü atema temelaba agütsü, ta Northern Territory Health otongdar kati ashi. Inyakyim kübok tashidak potetertem mesera close contact tem negative test result ka maru tashi India nung dang lia atatsü benoker lir.

India nungi aoertem Outback quarantine facility Howard Springs nung hopta ana quarantine asütsü.

Iba ita tetenzüklen sorkari Australia nunger densema senzügenpongtsü tenokdangba agütsür aliba sülen manidakertem tepuokdak ayutsü amokmerena liasü, koba Hokolbar ayaterem nung tembangogo.

India nung Australia nunger 9,000 shi alitsü ta amanger, kong anogoshi nisung lakh aika dak tashidak poteter aser asür atimba küma odar.

2020 küm nungi Australia nungertem bendangleni aotsü memelar aser bendangertema Australia semdangtsü atema temelaba agitsü nüngdaker.

Australia nung tang tashi nung Covid-19 tashidak kanga sashia prokshia aoba ken o bo mali, saka hotel quarantine facility tem nung tashidak poktetba aika ajangshioogo aser iba ajanga yimtem mokdanga yua liasü.

Dell-i XPS 15 aser XPS 17 laptop update sütsüogo



(9510) jenjang \$1,249.99 (sen 92,000) aser Dell XPS 17 (9710) jenjang \$1,449.99 (sen 1,10,000) alitsü. Dell indang laptop tasen anaprongla ya

DisplayHDR 400, 500 nits peak brightness, 100 percent Adobe RGB, 99 percent DCI-P3 aser tanga aika agütsüsü.

Dell XPS 15 telung nung 11th Gen Intel Core i9 - 11900H CPU aser Nvidia GeForce RTX 3050 Ti GPU deb 4GB VRAM aser 45W power output inoka yanglutsüogo. Storage option atema iba laptop nung 4TB pf PCIe SSD storage amshitetsü.

Ano külen, Dell XPS 17 nung 17-inch display angutsü, koba full-HD+ resolution mesüra ultra-HD 4K resolution den külemi amshitsü akok. Iba full-HD display nung 500 nits peak brightness aser 100 percent sRGB coverage dena lir. 4K display nung DisplayHDR certification, 500 nits peak brightness, Adobe RGB, 99 percent DCI-P3 aser tanga aika angutsü.

Iba laptop maparen 11th Gen Intel Core i9-11900HK CPU den Nvidia GeForce RTX 3060 GPU (70W) aser 4GB GDDR6 VRAM ajanga achaayangtsür. Dell XPS 15 ama XPS 17 nunga RAM aser storage option kasa angutsü.

New Delhi, Monupii/May 15, 2021 (Agencies): America indang computer yangluba company - Dell-i Intel 11th Generation Core H-series processor aketba Dell XPS 15 aser XPS 17 laptop ana sayaogo.

XPS 15 aser XPS 17 laptop anaprongla Dell indang taoba laptop design ama alitsü aser laptop ana nung InfinityEdge display den aspect ratio 16:10 keta aliba angutsü. Laptop ana nung Nvidia indang GeForce RTX 30 series GPUs den power output balala inoka yanglutsüogo.

Dell XPS 15 nung 15.6-inch display aser Dell XPS 17 nung 17-inch display keta lir. Model anaprongla nung pre-installed Windows 10 alitsü. Dell XPS 15

shishilemba teshimtet kar nung mezüng ayoktsü aser India nung iba laptop ayoktsü asoshi company ajanga osang tejangja ka magütsü.

Dell XPS 15 (9510) maparen Windows 10 Pro ajanga achaayangtsür aser iba laptop nung display option asem nung angutsü, koba mezüng baji - full HD+ panel ka den 500 nits peak brightness aser 100 percent RGB coverage angutsü. Tanabuba option ji 3.5K OLED touch display den HDR 500TB, 400 nits peak brightness, 100 percent DCI-P3 colour gamut coverage aser 1000000:1 contrast ratio alitsü. Tasembuba option atema 4K UHD+ touch display den

India nung Ducati Streetfighter 'V4' aser 'V4 S' saya



Ducati Streetfighter touzük seret 180 (Dry) aser iba motorcycle nung Euro 5 compliant 1103 cm3 Desmosedici Stradale engine angutsü. Motorcycle nung 90° V4 engine yagi 12,750 rpm nung 208 Hp agütsür, koba tanga naked segment nung tashi tulu agütsüba motorcycle aikabo mali.

Iba motorcycle yagi 9,500 rpm nung 123 Nm torque agütsür, koba Panigale V4 den kasa alitsü. Streetfighter V4 performance achaayangtsü atema Panigale V4 ama electronic tasen aika inoktsüogo aser Ducati Corse aerodynamicists ajanga yangluba 'biplane' wings bendenloktsü.

Maneni, Akrapovi? ajanga yangluba full-racing Ducati Performance exhaust inoka iba motorcycle indang power aser torque 220 hp aser 130 Nm tashi atsülanga amshitetsü akok. Iba exhaust ajanga motorcycle touzük seret 6 tashi ajemtsür.

New Delhi, Monupii/May 15, 2021 (Agencies): Honibarnü, Italy indang motorcycle yangluba company - Ducati-i India nung motorcycle sapurtemi yongya ataba Streetfighter V4 aser V4 S sayaogo.

India nung Ducati indang BS6 model sayaba rongnung Streetfighter model ya mezüng alitsü. 'Fight Formula' nung ajemdaker yangluba Streetfighter ya naked bike ama alitsü, kong tashitait V4 engine ka inoka yanglutsüogo.

Ducati Streetfighter nung V-shaped DRL inokja lir, koba Panigale V4 aser SuperSport anaprongla nung angur. Streetfighter ka ama, iba naked bike nung clip-on handlebars melen handle bar tuluba inoktsüogo. Iba den yarisemtsü asoshi foot peg position yimya balaka nung inoktsü, koba ajanga riding position ji sporty den ayong ayonga anitetsüsa yanglutsü. EICMA 2019 nung Ducati Streetfighter V4 ya 'Most Beautiful Bike' ama shima liasü.

Indiana Jones 5 nung Holbrook aser Wilson na denogo

New York, Monupii/May 15, 2021 (Agencies): 'Indiana Jones 5' indang cast rongnung Boyd Holbrook aser Shaunette Renee Wilson naprongla denogo.

Hugh Jackman indang 'Logan' nung shilem agisang Boyd Holbrook aser arishi küm 31 tain Shaunette nati iba nungtugu franchise indang installment pungobuba nung Harrison Ford den külemi shilem agiba angutsü.

Iba franchise tenzüker külen nungi Harrison-i tongti shilem agiba alima jangjaa lir aser installment tasenba nunga pai archaeologist ama shilem agiba angutsü.

Steven Spielberg melena James Mangold-i iba movie direct asütsü aser iba project nung Phoebe Waller-Bridge, Mads Mikkelsen den Thomas Kretschmann nungeri tongti shilem agitsü asoshi cast rongnung denogo.

Iba installment dak sendakba nung maparen/otsü tem meimbanga lir aser film tasenba nung cast tasen indang character shilem memetdaksü.

Nungtugu composer John Williams-i tanaben iba installment atema music yanglutsütsü. Tesüiba küm 40 tejakdang Indiana Jones: 'Raiders of the Lost Ark' nungi pai music mejemtsüogo.

PILAOGO SAKA MAMATETER

Asür I. Chuchu Jamir (Changtongya)



16TH MAY 2020

Tanü onok rongnung na meliaka, ne temoatsü agi onok takümlen anir.

Ne taküm onok asoshi temoatsü liasü, Ne temeim onok asoshi kanga senti liasü. Ne dak aketba jakla yimya tajung aser temeim shisatsü Onoki amatsü makok. Na shingaia melentsü makok. Onoki na menungrar aser mamateter.

- Temeim Kinungtsü, Jala, Jabaso & Kinungertem

SÜR KÜM KA AJUNGER


Temeim Lt.Rendijongshi
(May 16, 2020)

"Kotak nung aliba asen Obala den alitsü asoshi na onok nungi pilar tanü küm ka ajungdang, onoki na kanga menungrar. Nisung taküm yabo samatsü saka parnok asoshi meimba temeimbo kodanga mesamar. Na onok den yangi meliaka, asenok külemi aliba anogo aser mapang tajungtem teti onok mulungjang nung alitsü. Tsüngrem ket nung na lir aser onok mulungjang nunga na lir."

- Temeim kinungtsü,
jalatem aser kinungertem.



Allu Arjun indang "Pushpa" shilem ana lemsar sayatsü



Mumbai, Monupii/May 15, 2021 (Agencies): Telugu star Allu Arjun indang kanga dang yongya ataba film - "Pushpa" ya shilem ana lemsar sayatsü terenemba lir, ta film yanglurtemi metetdaksü.

Oshi balala nung yangluba action-thriller ya Andhra indang tenem tesem nung ozüng alema red sanders (Red Sandalwood) süngdongtem tsüngoka meima belenba indang otsü ka alitsü.

Mythri Movie Makers indang Producer Naveen Yerneni aser Y Ravi Shankar nati ashiba agi, iba film indang mezüng shilem ya August 13 nü sayatsü aser tanabuba installment ya 2022 küm ang sayatsü sentong lir.

"Iba film otsü aser character jenjang asadanga film ya shilem ana nung lemsar yanglua aser

sayatsü nüngdaka aküm," ta Yerneni aser Shankar nati ashi.

Tenati ashiba agi, iba film atema nungtugu star, artist aser technician tajungtem anioka külemi inyaksü maangka anguba atema pelar aser audience temi kodanga mamatetsüsa theatre nung iba otsü ajanga terepranger nem tajangshiba balaka agütsüsü.

Nungtugu "Arya" film yanglusang Sukumar-i iba Project zülüja aser direct süogo. Iba film ya Telugu den külemi Tamil, Hindi, Kannada aser Malayalam oshi nung sayatsü. Allu Arjun dak alaka, "Pushpa" nung Rashmika Mandanna-i Arjun den külemi shilem agiba angutsü.

Mythri Movie Makers den Muttamsetty Media longjemmer iba film yangluogo.


Nübur tenzüktetba asoshi pelar: Shikhar Dhawan Italian Open: Karolina final-i iogo

Gurugram, Monupii/May 15, 2021 (Agencies): Gurugram yimti nung Covid-19 wara anema raraba maparen nung pusema, Hokolbarnü India nung cricket asayar Shikhar Dhawan-i Gurugram police nem 'oxygen concentrator' tem tenla agütsü. Iba ama tenla tajung asoshi telangzüba agüja, Gurugram Police-i social media sabang ajanga Dhawan dang pelaba metetdaksü.

"Maparen takok ngua tejakleni bener aotsü asoshi onoki meranga inyakdar. aking forward our committed efforts. Oxygen Concentrator tem tenla agütsüba atema @SDhawan25 dang pelar," ta Twitter ajanga Gurugram Police-i lemsatsep.

Hokolbar anogo - tanünübuba atonga Gurugram nung nisung 2,500 dang nungi tajemba (2,144) dak Covid-19 positive puteta liasü. Tashidak tasen puteter densema iba yimti nung coronavirus tashidak puteter nisung 1,68,960 jungogo. Ano külen, Hokolbar anogo Gurugram nung nisung 15 tashi taküm samaogo. Iba yimti nung Covid-19 agi asür nisung 653 tuogo.

"Tang ama alima tensa tamajungdang, iba tenla tilaka ajanga külem nübur tenzüksü maongka anugba atema pelar. Külem nübur aser lokti tentet balala tajungtiba nung yaritsü



Shikhar Dhawan (File photo)

asoshi mulunga dang lir. India-i iba wara anema raraba mapatong koktettsü aser samatsütsü!," ta Dhawan-i telangzüba agütsü.

Tawa arishi küm 35 tain Dhawan-i Covid-19 vaccine agiogo aser iba tesashi wara samatsütsü asoshi linük mapatong pusema iba vaccine takaratiba nung agiadoktsü asoshi pai nübur ayongzük.

"Ni Vaccine agiogo. Frontline Workers temi bendanga agüja aser nendaka inyakba atema parnok dang alakteta pelaba shisemer. Atsüayonga teli aser takaratiba nung vaccine. Vaccine agiba ajanga iba virus akoktsü asoshi teyari agütsütsü," ta Dhawan-i pa vaccine agiba noksa ka den külemi iba olen lemsatsep. India nung Covid-19 wara

tanaben adoker oxygen alitsü atema teyari agütsütsü nükjidong nung, taoba ita Dhawan-i 'Mission Oyxgen' nung sen lakh 20 tenla agütsüogo.

Delhi nung soa intetsang Dhawan-i Indian Premier League (IPL) 2021 asayamung mapang anguba senpet sen coronavirus relief maparen atema tenla agütsü.

"Oxygen alitsü atema Mission Oxygen mapatong tsütsü teyari agütsütsü atema, sen lakh 20 tenla agütsüba den külemi IPL 2021 nung asaya temer nija takok anguba senpet sen ajak tenlatsü mulunga lir," ta Dhawan-i ashi.

May 04, 2021 nü IPL 2021 asayamung manentsüdang, iba League run chart nung Dhawan run timtiba yanglur liasü. Board of Control for Cricket in India (BCCI)-i iba asayamung thitemtsü telemtetba magidang, table temaba jenjang nung alir Delhi Capitals atema pai asaya 8 nungi average 54.28 nung 'fifty' 3 densema run 380 tashi yanglua liasü.

Nüngtugu T20 League - IPL 2021 asayaba mapang bio-bubble telungtet nung franchise asem nungi asayar 6, Chennai Super Kings nungi support staff 3 aser 'bus cleaner' ka dak Covid-19 positive putetba sülen, Indian cricket board-i iba T20 league asayamung thitsütsü telemtetba agi.



Karolina Pliskova-i Petra Martic koker pelaba noksa nung angur.

Rome, Monupii/May 15, 2021 (Agencies): Honibarnü, Italian Open asayamung tetsür kija semi final asaya nung Czech tsür seed tukububa Karolina Pliskova-i Croatia tsür Petra Martic madak takok ngua final tongtetogo.

Karolina-i Italian Open asayamung final tasembenbuba tongteteter alitsü.

Iba semi final asaya nung, taoba mapang world no. 1 Pliskova-i 6-1, 3-6, 6-2 agi Petra tsükdaksü. 2019 küm Karolina-i iba asayamung final koka liasü, saka taoba küm kasa asayamung final nung Romania tsür Simona Halep den asayaba mapang la yiruadokba ajanga asaya nungi tukadokba sülen Halep-i takok angu.

Iba draw nung top 10 asayar rongnung Pliskova dang anünga lir aser lai French Open champion Iga Swiatek mesüra

American tsür Coco Gauff den final asayatsü.

Kasa anogo tetsür kija quarter final asaya nung Poland tsür Swiatek-i seed pungobuba aser Italian Open anaben tashi takok angur Elina Svitolina madak 6-2, 7-5 agi kokogo. Swiatek aser Elina na tsüingda quarter final ya Hokolbarnü asayatsü renem, saka Rome nung tziunglu aruba ajanga iba asaya athi aser Honibarnü ang asaya liasü.

Tan hopta tetenzüklen, seed tasembuba Halep-a temola nung timtem aliba ajanga asayamung nungi tukadok. Italian Open 2021 asayamung tetenzüklen tukadoker rongnung seed tanabuba Naomi Osaka, pezüben tashi Rome asayamung (Italian Open) akokla Serena Williams, Sofia Kenin aser Petra Kvitova nung dena lir.

May 19 nü India football team Qatar-i aotsü



Indian Football team

New Delhi, Monupii/May 15, 2021 (Agencies): Taruba ita 2022 World Cup Qualifiers asayatsü lia asayartem training agidaktsütsü atema All India Football Federation's (AIFF)-i mepishiba agizükba sülen, May 19, 2021 nü Indian football team India nungi Qatar-i ayamesoa aotsü sentong lir.

India Football Team arudaktsütsü melaba den külemi, iba linük (Qatar) tonga arur sülen renema aliba - anogo 10 'hard quarantine' nung parnok madentsü atema AIFF ajanga mepishiba Qatar-i agizükogo. June 3, 2021 nü mezüng asaya metenzükdang, Qatar kübok bio bubble nung hopta ana jungnüa asayartem 'preparatory camp' ka nung shilem agitsü.

"May 19, 2021 nikongdang team pur yoktsü asoshi sentong yangludar. Qatar tonger sülen, parnok (asayartem) quarantine masütsü aser bio-bubble telungtet nung parnok

amungtsü," ta Honibarnü AIFF general secretary Kushal Das-i ashi.

Qatar-i maodang, asayartem ajak New Delhi nung adenshitsu aser COVID-19 atema tendangtsü.

2022 FIFA World Cup berth ka atema India pur kangarabo teimla melii kümogo, saka joint qualifiers nung 2023 Asian Cup atema merangdar. India indang tanünga asaya asem - Qatar (June 3), Bangladesh (June 7) aser Afghanistan (June 15) ya Asian Cup qualification atema kanga tongtibang lir.

Alima ajunga asünga coronavirus wara dak sendakba nung senzusenbongtsü aser quarantine atema ozüng takang aliba ajanga, Group E indang tanünga asayatem ayongzüktsü asoshi taküm March ita Asian Football Confederation-i Qatar tesem shima liasü.

Bodhbarnü, Das-i ashiba agi, India nung Covid-19 wara kanga

mejungi akümba ajanga National Football team ya linük nung training magitetsü aser World Cup qualifying round match tem asayatsü lia Camp ka atema bendanglen ayongtsü asadangshia liasü.

Head coach Igor Stimac tawabangba kübok May 2 nungi 21, 2021 tashi Kolkata nung national camp ka ayongzüktsü renema liasü. Iba sülen, hopta ka camp den külemi friendly match ka atema May 22, 2021 nü National team India nungi Dubai ayamesoa aotsü sentong renemer liasü.

Ajisüaka, India nung Covid-19 wara tanaben adoka aser tensa kanga mejungi akümba ajanga item sentong ajak thinenttsü.

Tang Group standing nung India team pur jenjang pezübuba nung lir. Asaya pungo nungi team-i point 3 ngua lir.

Tanünga fixture (asayatem) nungi India team-i ano point angutsü teimla nung asayatsü imlar aser parnoki point ngutetra, 2023 Asian Cup qualifying third round atema indang indanga qualify asütsü.

Taküm March ita, India-i mezüng international match tem asaya, koba 2019 November nungi asaya liasü. Iba mapang Dubai nung parnoki Oman aser UAE den friendly asayaogo.

March 25 nü India aser Oman na goal 1-1 nung tembang, saka March 29 nü UAE-i goal 6-0 agi India team tsükdaksü.

UEFA Champions League Final Portugal nung asayatsü

New Delhi, Monupii/May 15, 2021 (Agencies): Manchester City aser Chelsea na tsüingda May 29, 2021 (Honibar) asayatsü aliba Champions League final ya Istanbul nungi Portugal-i belenerogo, ta UEFA sangdong ka ajanga metetdaksü.

UK indang 'green travel' list nung Portugal dena lir asünung, Estádio do Dragão Stadium nung Club (final asayar team ana) shia nungi fans 6000 tashi melatsü terenemba lir.

"Portuguese FA (FPF) aser Portugal tekolakpurtemi asayatsü melar asünung, May 29, 2021 nü Estádio do Dragão, Porto nung Manchester City FC aser Chelsea FC na tsüingda UEFA Champions League final asayatsü," ta UEFA sangdong ka ajanga metetdaksü.

Iba final ya mezüngbo Istanbul kübok Atatürk Stadium nung asayatsü renem, saka 'COVID-19 travel' red list nung Turkey adentsü UK Sorkar indang telemtetba ajanga, iba tesem nung final asayara, asaya repringtsü atema club indang Stadium balala nung terepranger ka danga marudaktsüi küm ka süia aruba sülen, final asayar team anaprongla indang tereprangertem arudaktsütsü asoshi UEFA-i asalentong

yanglua liasü.

"UEFA-i iba final asaya England-i belener aotsü asoshi jembitepa liasü, saka Football Association aser tekolakpurtemi iba atema meranga jemiaka, UK nung quarantine agitsüsa akümba ajanga iba sentong mekoktet," ta sangdong nung shia lir.

Iba telemtetba sangoktsüba mapang, UEFA president Aleksander 'eferin-i, "Tesiüba küm asenok ajaki ajangshia aruba ama iba ama tensa ya ano küm jungnüa majurutsü imlaa atar aser iba nung ajaki mulungteptsü ta bilemer," ta ashi.

"Fans temi pei sapuba team asaya ita 12 dak tema Stadium nung repringtsü maongka mengui aruogo aser Champions League final tongtetba ya football club atema kanga dang tongtibang lir. Tsüingdong aruagi pei pei sapuba club pusema aser asaya repringtsü asoshi fans melatsü sentong meliasü, saka iba final asaya repringdaksütsü lenmang ka ngutetba atema pelar," ta pai ashi.

"Küm ka tashi fans temi Stadium nung asaya mereprangi arema arur sülen, iba season indang asaya tulutiba nung pei sapuba team pusema asaya repringtsü maongka magutsüra aji kanga dang tai," ta Aleksander-i shisem.

BILEMDANGANG

"Kija dang asüyonga ochi nung nokdakra ibaji tanangba."